



Na osnovu člana 6. stav 3. Uredbe o kriterijima za finansiranje programa i projekata neprofitnih organizacija i udruženja koji se finansiraju/sufinansiraju iz Budžeta Kantona Sarajevo broj: 02-05-29733-20.1/11 od 22.11.2011. godine, ministar za boračka pitanja Kantona Sarajevo r a s p i s u j e

**JAVNI POZIV**  
**za raspodjelu sredstava za finansiranje/sufinansiranje redovne djelatnosti i projekata boračkih udruženja u sastavu „Kordinacionog odbora boračkih organizacija Kantona Sarajevo“ i kantonalnih udruženja proisteklih iz HVO-a za 2012. godinu**

**I** Pravo učešća po ovom Javnom pozivu imaju boračka udruženja čija se redovna djelatnost i projekti finansiraju iz Budžeta Kantona Sarajevo.

**II** Na osnovu ovog Javnog poziva vršiće se finansiranje redovne djelatnosti i projekata kantonalnih boračkih udruženja u sastavu „Kordinacionog odbora boračkih organizacija Kantona Sarajevo“, u kojem djeluju slijedeća boračka udruženja:

1. Udruženje građana Jedinstvena organizacija boraca “Unija Veterana” Kantona Sarajevo;
2. Udruženje Savez ratnih vojnih invalida Kantona Sarajevo;
3. Udruženje Organizacija porodica šehida i poginulih boraca Kantona Sarajevo;
4. Savez udruženja logoraša Kantona Sarajevo;
5. Savez demobiliziranih branilaca odbrambeno-oslobodilačkog rata 1992-1995 Kantona Sarajevo;
6. Udruženje ratnih vojnih invalida paraplegičara Kantona Sarajevo;
7. Udruženje Organizatora otpora, Veterana rata, Dobrovoljaca, Prvoboraca i Branioca “Bosnae – Zelene beretke” Kantona Sarajevo;
8. Savez udruženja dobitnika najvećih ratnih priznanja “Zlatni ljiljan” i “Zlatna policijska značka” Kantona Sarajevo;
9. Savez udruženja antifašista i boraca narodnooslobodilačkog rata Kantona Sarajevo;
10. Savez udruženja boraca “Patriotska liga” Kantona Sarajevo;
11. Udruženje veterana odreda policije „Bosna“ Kantona Sarajevo i
12. Kantonalna udruženja proistekla iz HVO-a.

**III** Boračka udruženja iz tačke II Javnog poziva podnose pismeni zahtjev za finansiranje/sufinansiranje redovne djelatnosti i projekata iz kojeg se vidi ispunjenost kriterija.

Kriteriji za raspodjelu sredstava

Opći kriteriji za raspodjelu sredstava su:

1. Registracija udruženja na bilo kojem nivou vlasti u Bosni i Hercegovini;
2. Realizacija projekata udruženja koji su od interesa za građane Kantona ili doprinose razvoju i afirmaciji Kantona i provode se na području Kantona;
3. Ekonomska ili društvena opravdanost projekta koje udruženje predlaže i sprovodi;
4. Program rada za 2012. godinu sa obrazloženjem;
5. Finansijski plan za 2012. godinu;
6. Izvještaj o urednom finansijskom poslovanju (bilans stanja, bilans uspjeha i narativni izvještaj za 2011. godinu);



web: <http://mbp.ks.gov.ba>  
e-mail: [minbopi@ks.gov.ba](mailto:minbopi@ks.gov.ba);

Tel: + 387 (0) 33 562-012, Fax: + 387 (0) 33 562-251  
Sarajevo, Reisa Džemaludina Čauševića 1





7. Finansijski izvještaj o utrošku sredstava za projekte odobrene u 2011. godini;
8. Organiziranost i broj članova udruženja;
9. Broj lica koja učestvuju u realizaciji projekata;
10. Specifičnost potreba članova udruženja, odnosno populacije koju zastupaju;
11. Rezultati i uspjesi na kantonalnom, federalnom, državnom i međunarodnom nivou, odnosno broj korisnika obuhvaćenih projektom.

Posebni kriteriji koji se odnose na projekte udruženja su:

1. Projekti i programi kantonalnih boračkih udruženja,
2. Programi resocijalizacije i integracije boračke populacije u društvenu sredinu (dodatna edukacija, rehabilitacija i prekvalifikacija, zadovoljenje potreba koje osobe sa invaliditetom ostvaruju na specifičan način uz korištenje specijalnih pomagala),
3. Projekti očuvanja i njegovanja tradicije oslobodilačkog rata, tradicionalnost, ugled i interes javnosti (npr. obilježavanje značajnih događaja, datuma i ličnosti shodno Odluci o utvrđivanju "Kalendara za obilježavanje značajnih događaja, datuma i ličnosti iz perioda odbrambeno-oslobodilačkog rata 1992.-1995. godine na području Kantona Sarajevo" i Odluci o utvrđivanju "Kalendara za obilježavanje značajnih događaja, datuma i ličnosti iz perioda narodnooslobodilačkog rata 1941.-1945. godine na području Kantona Sarajevo"),
4. Projekti humanitarnog karaktera sa ciljem pomoći socijalno najugroženijim pripadnicima boračke populacije,
5. Saradnja udruženja sa državnim organima na svim nivoima,
6. Programi odgojnodruštvenog značaja,
7. Masovnost članstva i razvojna funkcija,
8. Programi koji podstiču razvoj društva i vjersku toleranciju,
9. Programi sportsko-rekreativnog i rehabilitacionog karaktera,
10. Aktivnosti i uključivanje što većeg broja lica sa invaliditetom u rad udruženja,
11. Sportske manifestacije i memorijalni turniri u organizaciji boračkih udruženja,
12. Programi pomoći u liječenju, stambenom zbrinjavanju i rehabilitaciji,
13. Programi pružanja besplatne pravne pomoći boračkoj populaciji,
14. Rješavanje problematike boračke populacije,
15. Pomoći za liječenje i zdravstveno i socijalno zbrinjavanje,
16. Podrška projektima pisana riječ „da se ne zaboravi i ne ponovi“,
17. Aktivnost i uključivanje što većeg broja pripadnika RVI, logoraša, žrtava torture i nacionalnih manjina u rad udruženja i
18. u drugim opravdanim slučajevima.

**IV** Dokumentacija koja se treba dostaviti uz zahtjev:

1. Popunjen obrazac za aplikaciju za finansiranje/sufinansiranje projekta, koji sadrži: naziv projekta, opis problema/potreba, kratak opis projekta, ciljevi, ciljne grupe, plan realizacije projekta, trajanje projekta, osoblje i budžet;
2. Rješenje o registraciji;
3. Uvjerenje o poreskoj registraciji – identifikacioni broj;
4. Uvjerenje o izmirenim poreskim obavezama;
5. Uvjerenje o izmirenim porezima i doprinosima za zaposlenike (ukoliko ima zaposlenika); Udruženje koje nema uposlenih i neizmirenih obaveza može dostaviti ovjerenu izjavu kod nadležnog organa, da nema uposlenih i neizmirenih obaveza kojom to potvrđuje.





6. Bilans stanja i bilans uspjeha ovjereni od strane nadležne ustanove (Obzirom da su udruženja iz tačke II Javnog poziva dostavila navedene obrasce za 2010. godinu, ista su dužna dostaviti bilans stanja i bilans uspjeha za 2011. godinu do marta mjeseca 2012. godine);
7. Izvještaj o utrošku sredstava za projekte odobrene u prethodnoj godini (projekte finansirane iz redovnog poslovanja i posebno finansirane projekte).
8. Finansijski plan za 2012. godinu u okviru kojeg treba obuhvatiti sredstva za bruto plaće zaposlenih ili na drugi način angažovanih lica sa navedenom kadrovskom strukturom, sredstva za materijalne troškove za rad udruženja, projekte koji se planiraju realizovati iz sredstava za redovno poslovanje i posebno finansirane projekte, tekstualno obrazložene planiranih veličina, specifikacija ukupno potrebnih sredstava, u skladu sa Uputstvom za izradu zahtjeva za finansiranje rada i projekata boračkih udruženja u sastavu „Kordinacionog odbora boračkih organizacija Kantona Sarajevo“ broj: 06-14-5197/10 od 18.03.2010. godine a do donošenja novog pravilnika u skladu sa članom 12. Uredbe o kriterijima za finansiranje programa i projekata neprofitnih organizacija i udruženja koji se finansiraju/sufinansiraju iz Budžeta Kantona Sarajevo;
9. Finansijski izvještaj za period od 01.01. do 30.09.2011. godine i plan prihoda i rashoda za period od 01.10. do 31.12.2011. godine. Finansijski izvještaj za period 01.01. do 30.09.2011. godine treba obuhvatiti obrazloženje troškova zaposlenih tj. lica u radnom odnosu pri čemu treba navesti broj zaposlenih, stručnu spremu, isplate na mjesečnom nivou i na nivou izvještajnog perioda u bruto i neto iznosu, isplaćene naknade troškova zaposlenih obrazložiti po vrstama naknada, navesti broj zaposlenih lica koja su primila naknadu i iznos po zaposlenom na mjesečnom nivou i na nivou izvještajnog perioda. Za lica angažovana po ugovoru o djelu ili drugoj vrsti ugovornog angažmana neophodno je objasniti osnov isplate odnosno ugovoreni posao kao i isplaćena sredstva na mjesečnom nivou i na nivou izvještajnog perioda u bruto i neto iznosu. Navedena obrazloženja dostaviti u skladu sa Uputstvom za izradu izvještaja o utrošku sredstava boračkih udruženja u sastavu „Kordinacionog odbora boračkih organizacija Kantona Sarajevo“ broj: 06-05-5181/10 od 18.03.2010. godine, a do donošenja standardnog obrasca za dostavu narativnog i finansijskog izvještaja, kojeg je dužno izraditi Ministarstvo finansija u skladu sa stavom 1. člana 10., odnosno donošenja pravilnika u skladu sa članom 12. navedene Uredbe;
10. Osim navedene dokumentacije udruženja iz tačke II Javnog poziva dužna su dostaviti dokaz o ispunjavanju ostalih općih kriterija tj. dokaz o organiziranosti i broju članova udruženja, broj lica koja učestvuju u realizaciji projekta, specifičnost potreba članova udruženja, rezultati i uspjesi na svim nivoima, broj korisnika obuhvaćenih projektom kroz popunjene obrasce za prijavu projekata.

**V** Udruženja koja nisu dostavila narativni i finansijski izvještaj o utrošku sredstava za rad udruženja i projekata sa pratećom dokumentacijom, za koja su odobrena budžetska sredstva, ne mogu biti prihvaćena za finansiranje/sufinansiranje rada i projekata za 2012. godinu.

**VI** Projekte treba obrazložiti u skladu sa podacima sadržanim u Obrascu za prijavu projekata za finansiranje/sufinansiranje iz Budžeta Kantona Sarajevo (OBR.7.3-02-01/01), koji se može naći na protokolu i web stranici Kantona Sarajevo.

**VII** Troškovi rada udruženja ne mogu preći 60% odobrenih sredstava, odnosno minimalno 40% sredstava je potrebno utrošiti za projekte iskazane u programu rada udruženja definisanim





Procedurama o kriterijima za raspodjelu, korištenje, kontrolu i izvještavanje o utrošku sredstava za grantove pojedincima, udruženjima i institucijama, a do donošenja pravilnika u skladu sa članom 12. navedene Uredbe.

**VIII** Visinu sredstava za raspodjelu po ovom Javnom pozivu utvrđuje resorno ministarstvo na osnovu usvojenog Budžeta Kantona Sarajevo za 2012. godinu.

**IX** Proceduru odobravanja sredstava po ovom Javnom pozivu provodi posebna komisija koju imenuje ministar. Uzimajući u obzir dosadašnji nivo finansiranja, opravdanost zahtjeva, kvalitet ponuđenog programa i projekata, kao i navedene kriterije (na osnovu dotavljene dokumentacije), te mogućnosti finansiranja/sufinansiranja u odnosu na odobrena budžetska sredstva za ove namjene, komisija će sačiniti prijedlog liste udruženja za finansiranje/sufinansiranje rada i projekata.

**X** Odobrena sredstva će se doznačavati udruženjima u odgovarajućim mjesečnim tranšama ili na drugi pogodan način.

**XI** Sredstva odobrena po osnovu ovog Javnog poziva se moraju iskoristiti namjenski, pri čemu se korisnik sredstava mora pridržavati važećih zakonskih propisa.

**XII** Udruženja su obavezna nakon realizacije odobrenih projekata ili aktivnosti dostaviti izvještaj o namjenskom utrošku odobrenih sredstava zajedno sa odgovarajućom dokumentacijom. Rok za dostavu izvještaja je 15 dana od dana okončanja projekta ili aktivnosti.

**XIII** Rok za podnošenje prijave po ovom Javnom pozivu je 8 dana od dana objavljivanja.

**XIV** Nepotpune i neblagovremene prijave neće se uzimati u razmatranje.

**XV** Javni poziv za sufinansiranje ostalih udruženja sa projektima od interesa za boračku populaciju Kantona Sarajevo će biti naknadno objavljen na osnovu sredstava predviđenih u Budžetu Kantonu Sarajevo za 2012. godinu.

Broj:06-14-31572/11

Sarajevo, 13.12.2011.godine

**MINISTAR**

**Doc. dr. Nedžad Ajnadžić**

